

初五日。威妥玛过谈，言俄、土战事。言土图统领凡三：一、苏利曼巴沙，在巴尔铿山口曰希布喀；一、阿里巴沙，在苏满江；一、倭斯满巴沙，在百勒弗拉。鲁美尼亚国主会俄兵围百勒弗拉甚急，而苏利曼、倭斯满两路之军皆不至，是将帅不和也，终恐不足以御俄人。而鲁美尼亚及色尔维及满得尼克洛三国皆会兵助俄，土必不支矣。然俄兵胜，诸国必有起而相助议和者；土兵胜则和议不成，以俄人无所得利，则必积愤以求一逞，亦耻言和也。大率俄、土情形，当不越此。李丹崖、（何）〔罗〕稷臣枉谈。

初六日。拜发吁请销差奏折，及言事一件。便致总署及吴江相国、合肥伯相二缄，及家信第十一号，及志城及赫乐斌各信。马格里告言：苏格兰都城爱敦百里人曰贝尔，在沙尔推尔地方安设声报，可及六十里之远，鼓弦纵谈，六十里如在左近。特邀侯敦往视。于光报之外又悟出一声报，此间心思之巧，安有穷极也。新报载：印度灾荒，英人议助赈，十馀日间已捐及十三万磅。马格里因言，英人最喜为此等事，如土、俄交战，英人助土捐款至巨，略分两款：一、内里斯得朗弗思得捐养给妇女，亲往料理，其夫故充君士坦丁公使，而英国妇女随往者颇多，意在勇于为善也，一、思达法得会：色喀仑公所居宅曰斯达法得，英人相就议助收养土国受伤兵勇，因名斯达法得会。而巴西告饥，乞捐助于栗温浦。盖英人好善乐捐之名，在欧罗巴为素著名也。

初七日。英国旧充古巴副领事克洛法尔得，偕白尔斯阿廓得、斯得尔治、亨得森、斯百里、得拿六人呈递古巴华工谢歉融公呈，云属其至北京呈递，克洛法不敢应也，为呈递外部，外部不受，盖去岁十一月事也。至是始来递。询知克洛法住古巴都城哈法拿三十年，记载华民至古巴充工人数甚悉。其始至当道光之廿七年，西历一千八百四十七年也，至同治十二年止，凡二十七年。最多

者，咸丰七年西历一千八百五十七年一万二千三百八十四人，同治五年西历一千八百六十六年一万三千零四十三人，同治四年一万四千四百十四人，最少者咸丰十年西历一千八百六十（二）年三百四十四人。通计用船三百四十二计廿四万九千零一十五吨，装运华民十三万八千一百五十六人，至哈法拿者十二万一千八百十人，其间妇女十二人而已。同治十二年始禁华民出洋，葡萄牙之驻澳门者亦禁止古巴船，不听在澳门贩卖人口。于是五年内无华民至古巴者。克洛法不忍华民之窘辱，常保护之，指目为香港属民，于是脱归及贸易古巴者常多。问有何办法，曰：英、法，美三国为日士巴尼牙所心慑，得三国人为领事，乃可办。语以日人所最忌在此，在京师以此条为首禁。曰：然则三国领事帮助之。问：中国派一领事，三国能帮助乎？曰：不能。须得外部饬知。且领事往，日人不受，亦无如何。问：然则必派公使乎？曰：公使驻日都马得利得，与其国家辩论为宜。华工所以冤苦，在无章程耳。能由公使定立章程，优于领事之保护矣。问：公使至而彼不从，奈何？曰：亦须三国助之。问：三国公使肯相助乎？曰：外部命之相助，谁敢不从。问：日使在京，狡展百端，似古巴事亦非所能主断。曰：是不然也。其国家定立章程，谁敢违之。彼意在狡赖耳。询问白尔得阿廓尔为禁止掠买人口会参赞，馀皆会中人也。所办理者阿非利加黑奴，与此为类，故乐相附从。询知哈法拿总督名何非拉尔，英国总领事名古博尔，法国总领事名射法利尔，美国总领事名何尔。而英国驻日公使雷雅尔得，近调赴土耳其都城君士但丁，其署公使名洼得生。接上海文报局六月十八日由法国卑可公司船发递第卅五号包封，内总署六月初二日第十信，并补发三月廿一第八信，外合淝伯相、周晓棠、唐景星三信。

初八日。发递合淝伯相、沈幼丹、丁雨生，及总署周晓棠一